

112

iedoch mit ime geredt und begert, er solle inen den weg
gen Mengen zaigen; haben in also gewaltiglich und wider
seinen willen gefüert bis uf das brückle neben Igelswis. Do
hat er doch den allmechtigen so trewlichen angerüeft und
5 gebetten, das er in nit verlasen, sonder von dem gespenst
vätterlichen erlösen welle. Also einsmals sein inen zwo
junge frawen, die er nit gekent, in lauter weisen claidern
angethon, bekommen. Die haben sovil mit den zwai
manspersonen geredt und gethedinget, das sie in letstlich
10 und doch beschwerlichen von handt und uf dem brugklin
ledig gelasen, und damit sein die weiber und die mansper-
sonen augenblicklichen verschwunden, das er nit gewist,
wohin die kommen. In dem, als das gespenst von ime
abgewichen, do hat er uf der Igelswiser höche im holz ain
15 solchs grausamlichs, lauts brastlen und gedöfs gehört, das
nit anders bedeuchte, als ob alle die beum daselbs darnider
und durch einandern weren fallen. Der guet gesell hat
umbgekert und mit groser müeh ist er kümmerlich wider in die
mülle kommen und eim todten vil mehr, dann eim leben-
20 digen, gleichnet. Er ist bei vierzehen tagen so krank ge-
legen, das er mit allen sacramenten ist hingericht worden
und meniglich seins absterbens sich versehen gehapt. Aber
durch die gnad des allmechtigen ist er widerumb ufkommen
und lebt in disem 1566 jar noch. Das ist im aber gewiss-
25 lichen, wie gehört, in obermeltem jar begegnet.

Eben in dem selbigen jar hat sich vast ein gleicher
fahl bei den sandtgraben zu Schonlich hünder dem Enriedt
begeben. Es het Bilgri von Hewdorf ein hundzieher und
bosselknecht im haus, der hiefs Hanns Koch. Derselbig het
30 einsmals zu Mösskirch zu thuen, alda er sich verspetet, das
er am abendt ganz spat wider heim gieng. Wie er aber
vor der stat uf der Tannen benachtet und forter zu den
sandtgruben zu Schonloch kompt, die dann gleich am weg
sein, do kompt ein gespenst an ine. Das erwüschit ine beim
35 haar, füert in dabei im veldt umbher, iez für sich, dann
hünder sich. Der guet koch kunte sich nit weren, muest
folgen, wo man ine hinfürt. Letstlich, als er sonst in keinen
weg von dem kerlen kommen, do hat er den allmechtigen
Got so getrewlichen angerüeft, daz in das gespenst doch
40 verlasen. Ist dieselbig nacht haim kommen wie ein unbe-
sinter mentsch.

Aber uf und allernechst dem pruckle zu Igelswis do ist